

摘藻堂四庫全書薈要

經部

欽定四庫全書薈要卷三千二百八十七

經部

爾雅翼卷七

宋羅願撰

釋草七

藟 芡 味 參 蕩 著

茨 烏喙 門冬 顛棘 藁荷 活菀

蓼 蘼 荏 芥

藟

藟大苦今之甘草味甘而無毒能安和七十二種石千

二百種草考故於人譬之國老不入君臣佐使之列雖
非君而為君所宗以其能變和故也詩稱山有榛隰有
薺以况西方之美人又采薺首陽之顛以刺獻公之信
讒蓋一章采薺二章采苦三章采葑薺甘而苦若讒者
之入人必先甘而後苦而葑則甘苦相半所謂采葑采
菲毋以下體下體惡而上體美者也則讒人之所以嘗
試其君者無所不用矣此草蔓生葉似荷青黃莖赤有
節節有枝相當然不惟葉似荷古之蓮字亦通於薺故

龜策列傳稱龜千歲乃游蓮葉之上徐廣曰蓮一作苓
聲相近借字也將以龜老而神故形小而陸游以為奇
若水中之蓮凡龜皆可游不足言矣又詩采苓以首陽
之顛叶之豈藟亦有蓮音耶然藟甘而名大苦者猶牽
牛有三黑點而名為三白點此蓋秦俗所沿見禮記或
素或青注

芡

芡者今之地黃古以為菜鉶羹用之禮記曰鉶毛牛藿

羊芡承薇考蓋物各有所宜古者祭祀賓客有大羹鉶羹大羹者太古之羹鑊中煮肉汁不調以鹽菜及五味盛之於登鉶羹者謂陪鼎腳臄臄用藿芡薇調以五味盛於鉶器蓋鉶羹以所盛器為名盛於豆則名庶羞爾皆天官亨人供之三牲所以用此者猶婦教成之祭牲用魚芼之以蘋藻各有所宜亦牛羊山陸之物藿芡山陸之菜承近水薇垂水魚及蘋藻生水中以類求之今禮記羊芡作苦則苦菜爾考古之說方者一生咸陽川

澤中黃土地者佳則名之為地黃蓋有所自又生者以
水試之浮者名天黃半沉半浮名人黃沉者名地黃以
沉者為良宜其以地為名而芑字又從下亦趨下之義
也淮南子曰今夫地黃主屬骨而甘草主生肉之藥也
以其屬骨責其生肉以其生肉論其屬骨是猶王孫綽
之欲倍偏枯之藥而欲以生殊死之人亦可謂失論矣
今地黃能生肌肉與淮南說異又方藥煎忌鐵器研羹
用之未知其審

味

味莖藉郭氏以為五味今五味子是也皮肉甘酸核中
辛苦都有鹹味味既具矣故其字從味且能兼養五藏
也典術曰五味者五行之精仙人羨門子服之而本草
直云味酸者木以酸為主又所出不同亦各偏勝如出
高麗者多肉而酸甘出青冀者過酸出建平者味苦不
害其兼有五味也其莖赤斑花黃白生青熟紫亦具有
五色聖賢冢墓記曰孔子墓上有五味木

參

春秋運斗樞曰搖光星散為人參廢江淮山瀆之利則
搖光不明人參不生禮斗威儀曰君垂木而王有人參
生說文云人蔓出上黨蔓即參也所以名為人參者本
草云如人形者有神范蠡計然亦曰狀類人者善說者
曰出新羅國所貢有手脚狀如人形長尺餘或云生邯
鄲者根有頭足手面目如人或曰生上黨者人形皆具
能作兒啼說益侈則益誕大率生深山中近樛漆下濕

潤處概似桐而多蔭故人參生其下高麗人作人參讚
曰三極五葉背陽向陰欲來求我概木相尋欲試上黨
人參者當使二人同走一與人參含之度走三五里許
其不含者必大喘含者氣息自如潛夫論曰治疾當得
真人參反得蘿菔梁阮孝緒母疾須得生人參舊傳鐘
山所出孝緒躬歷幽險見鹿前引就鹿滅處視之得此
草傳子曰先王之制九州異賦天不生地不養君子不
以為禮若河內諸縣去北山絕遠而各調出御上黨真

人參者十斤下者五斤所調非所生民以為患其潞州
太行山所出者謂之紫團參

蕩

遂蕩馬尾郭璞曰廣雅云馬尾蒿陸本草別名蕩今關
西亦呼為蕩江東呼為當陸生人家園圃中高三四尺
葉青如牛舌而長莖青赤至柔脆夏秋開紅紫花作朵
根如蘆菔而長如人形者有神案人參亦言如人形者
有神而采艾見若似人處攬而取之用灸有驗物理乃

不可勝窮易曰覓陸夬夬覓與陸皆陰類也或曰此一物即名覓陸今俗名章柳根又一名夜呼莫知其義據荆楚歲時記三月三日杜鵑初鳴田家候之此鳥鳴晝夜口赤上天乞恩至章陸子熟乃止然則章陸子未熟以前為杜鵑鳴之候故稱夜呼

著

聖人幽贊於神明而生蓍蓍草也初不待聖人而生蓋通天之道窮物之理備物致用以為天下利故能擇物

之神者用之夏商欲卜者乃取蓍龜已則棄去之以為
龜藏則不靈蓍久則不神至周室之卜官常寶藏蓍龜
天子蓍長九尺諸侯七尺大夫五尺士三尺蓍陽故數
奇其藏蓍之器曰鞮鞮有二以皮為之其一從上而下
韜之其一從下而上韜之少牢禮曰史西面于門西抽
下韜左執筮右兼執革以擊筮將問吉凶故擊之以動
其神蓍雖寶藏猶有時以易故筮人上春相筮先儒以
為相謂更選擇之龜筮歲易者歟蓋龜人以春政龜筮

人春相之故知以新易故古者國之大事先筮而後卜
然魯生季友晉戰城濮皆先卜而後筮者蓋太史公所
謂三代著龜大小先後各有所尚要其歸等耳是也春
秋傳稱筮短龜長不如從長莫能得其說案龜策傳江
南長老云龜千歲乃遊蓮葉之上著百莖共一根其所
生獸無虎狼草無毒螫說者曰著百年則百莖矣蓋龜
歷年深故知來亦長著歷年近故知來亦短亦龜象筮
數物生而後有象象而後有滋滋而後有數則龜在先

筮在後短長之驗也。龜筮皆靈物，用既相須，故生亦相附。龜策傳又曰：上有叢蓍，下有神龜，蓍生滿百莖者，其下必有神龜守之；其上常有青雲覆之，固靈氣相召，亦天地鬼神所保守。然則其龜即周禮十龜中所謂筮龜者也。龜為卜，蓍為筮，龜而謂之筮，以其生於蓍叢也。蓍之為字，從耆。耆者，六十歲也。王充論衡：孔子曰：「蓍之為言耆也。」老人歷年多而更事久，似能前知，然何獨六十龜策傳曰：「天下和平，王道得而蓍莖長丈，其叢生滿百。」

莖方今世取著者不能中古法度不能得滿百莖長丈者取八十莖已上長八尺即難得也人民好用卦者取滿六十莖以上長滿六尺者即可用矣然則自其可用者而言之廣為六十莖從為六十寸故應耆爾

論衡曰著七十

歲生一莖七百歲生十莖漢藝文志有著書二十八卷

著實服之亦聰惠先知

茨

茨蒺藜也布地蔓生細葉子有三角狀如菱而小刺人生道上長安最饒人行多著木屐故易以據于蒺藜言

所恃傷也七諫曰江離棄於窮巷兮蒺藜蔓乎東廂東
廂者宮室所嚴禮樂所在觀其所生以知治忽故瑞應
圖云王者任用賢良則梧桐生於東廂今蒺藜生之以
見所任之非人趙簡子曰夫植桃李者夏得其休息秋
得其食焉植蒺藜者夏不得休息秋得其刺焉以見陽
虎所植之非其人則與七諫義同也詩牆有茨言衛公
子頑國人疾之而不可道蓋茨雖可惡依牆以生欲埽
去之則恐傷牆以喻公子頑雖可疾欲道之則恐傷國

體叔孫怒季孫指楹而言曰雖惡是其可去乎亦此義也正義引媒氏云凡男女陰訟聽之於勝國之社勝國亡國也亡國之社掩其上而棧其下使無所通故就以聽陰訟明不當宣露則其社之牆亦有茨不可知爾今軍旅亦以鐵作茨以布敵路謂之鐵蒺藜或云鐵蒺藜菱角等起於隋煬帝征遼為之然六韜中已有此物考晁錯傳謂之渠荅諸葛亮卒於五丈原魏人追之長史楊儀多布鐵蒺藜則其來已久

烏喙

烏喙今之烏頭也釋草云芰莖草郭璞云即烏頭今江

東呼為莖晉驪姬譖申生寘鴆於酒寘莖於肉者是也

非莖莖之莖

說文云莖
烏頭也

今烏頭與附子同根春時莖初

生有腦形似烏鳥之頭故謂之烏頭或曰有兩岐相合

者名烏喙要之烏喙即烏頭之異名耳本草冬月採為

附子春月採為烏頭博物志亦曰物有同類而異用者

烏頭天雄附子一物春夏秋冬採之各異謝靈運山居

賦曰三建異形而同出而說者又以烏頭烏喙附子側子葷色理形狀亦各不同而長三寸已上為天雄葢種子烏頭而不生附子側子之類經年獨長大者是也蜀人種之忌生此以為不利如養蠶而為白殭之類也廣雅則曰一歲為莢子二歲為烏喙三歲為附子四歲為烏頭五歲為天雄蘇秦曰人之飢所以不食烏喙者以其雖偷充腹而與死同患也後魏書曰匈奴秋收烏頭為毒藥以射禽獸淮南子曰天下之物莫凶於奚毒然而

良醫索而藏之有所用也奚毒即附子漢霍顯使醫擣附子入與許后后曰我頭岑岑也藥中得無有毒是其事

門冬

牆薜蘿冬郭璞曰今門冬也一名滿冬按薜蘿冬有二其一則天門冬一名顛棘釋草所謂髦顛棘也故郭璞注顛棘云細葉有刺蔓生其一則麥門冬生山谷肥地葉如韭四季不凋根有鬚作連珠形似穉麥顆故名麥門

冬四月開花淡紅如紅蓼花實圓碧如珠秦名羊韭齊
名愛韭楚名馬韭越名羊著謝靈運山居賦曰二冬並
稱而殊性潛夫論曰夫理世不得真賢譬猶治疾不得
真藥也治疾當得麥門冬反得蒸穡麥已不識真合而
飲之疾以瘳劇而不知為人所欺也山海經曰條谷之
山其草多芍藥蘼冬

顛棘

髦顛棘釋曰一名商棘廣雅云女术也考郭云細葉有

棘蔓生按本草天門冬一名顛勒道家方云天門冬一

名顛棘在東嶽名淫羊藿在中嶽名天門冬在西嶽名

管松在北嶽名無不愈在南嶽名百部在京陸山阜名

顛棘雖處處皆有其名各異其實一也張華博物志云

莖間有刺而葉滑者名曰却休一名顛棘根以浣縑素

白越人名為浣草似天門冬而非也凡服此先試浣衣

如法者便非天門冬按此說則顛棘刺而滑可浣衣與天

門冬異而圖經曰天門冬春在藤蔓大如釵股高至丈

丈餘葉如茴香極尖細而疎滑有逆刺亦有澁而無刺者其葉如絲杉而細散皆名天門冬是滑而有刺者亦門冬也蓋兩者皆門冬而有刺者別名顛棘耳棘即刺也列仙傳赤須子食天門冬齒落更生細髮復出甘始服之在人間三百餘年杜子微服之御妾多子日行三百里

蘘荷

蘘荷宜在林木陰下種之故古人云蘘荷依陰時藿向

陽言各有所宜也葉似初生甘蔗根似薑牙其葉冬枯其根為菹亦可醬中藏古之為味者雜用膾炙切藜荷以為香是為珍味大招曰醯豚苦狗膾苴蓐只苴蓐即藜荷也藜荷有白有赤神農經書白藜荷今人乃呼赤者為藜荷白者為覆菹

說文曰
菹菹

葉同一種爾於人食之

赤者為勝藥用白者中蠱者服其汁并卧其葉即呼蠱主姓名亦主諸溪毒沙蟲輩人家種之辟蛇又有預知子傳云取二枚綴衣領上遇蠱毒物則聞其有聲當便

知之故名預知子若行蠱毒之鄉食飲不可知非仗此

何以愛身

柳子厚種白蓂荷詩庶氏有嘉草攻
檜事久泯炎帝垂靈編言此殊足珍

活菰

離南活菰今通脫木也山海經名寇脫考生山側高丈

許葉如葦麻花上有粉莖中有瓢輕白可愛女工取以

飾物按此物為飾不知起自何世漢王符潛夫論固已

譏花采之費至梁宗懔記荆楚之俗四月八日有染絹

為芙蓉捻蠟為菱藕亦未有用此物者今通行於世矣

亦用蜜藏食之今俗謂之通草按通草作藤蔓大如指其莖幹大者徑三寸每節有二三枝枝頭出五葉夏秋開紫花或白花白花結實如小木瓜核白瓤黑食之甘美南人謂之燕覆亦云烏覆非此類也

蓼

蕃虞蓼郭氏云即蓼之生水澤者也蓼類甚多有紫蓼赤蓼青蓼馬蓼水蓼香蓼木蓼等紫赤二蓼葉小狹而厚青香二蓼葉相似馬水二蓼葉俱濶大上有黑點諸

蓼花皆紅白子赤黑木蓼一名天蓼蔓生葉如柘花黃
白子皮青滑其最大者名龍已見別章中蓼者妨稼之
草故詩曰以薺荼蓼荼蓼朽止黍稷茂止然於調和有
用故內則云膾秋用蓼鶉羹雞羹鴛釀之蓼釀謂切雜
之也漢尹都尉書有種芥葵蓼韭葱諸篇而長沙定王
故宮有蓼園周頌曰未堪家多難予又集于蓼蓼辛物
故以為多難之喻越王苦思報吳卧則以蓼楚辭曰蓼
蟲不知徙乎葵菜言蓼辛葵甘蟲各安其故不知遷也

而魏子曰蓼蟲在蓼則生在芥則死非蓼仁而芥賊也

本不可失

南都賦蓼
載藁荷

蘓

蘓桂在郭氏曰蘓在類故名桂在說者曰以其味辛而
形類在故名之葉下紫色而氣甚香今俗呼為紫蘓煮
飲尤勝取子研汁煮粥良長服令人肥白身香亦可生
食與魚肉作羹沙州記曰乞佛虜不識五穀唯食蘓子
南都賦曰蘓葢紫薑拂徹羶腥今蘓有數種皆是桂類

白蘓方莖圓葉不紫亦甚香實亦入藥魚蘓似茵陳大
葉而香吳人以煮魚者一名魚薺其生山石間者名山
魚蘓又有水蘓一名雞蘓或言雞蘓水蘓是兩種又有
假蘓者亦以香氣似蘓故名蘓說者云假蘓即荊芥或
曰假蘓葉銳而圓非荊芥也

荏

荏陶隱居云荏狀似蘓而高大白色不甚香其子研之
雜米作糜甚肥美下氣補益江東人呼為蘓以其似蘓

字但除未邊也。筴其子作油煎之。即今油帛及和漆所用者。服食斷穀亦用之名。為重油。蓋江東以荏子為油。北土以大麻為油。又其言名為蕒。似是蕒中魚。蕒耳。蕭炳云。有大荏形似野荏。高大葉大於小荏一倍。不堪食。人收其子以充油。絹帛其小荏子欲熟。人採其角食之。甚香美。蕒荏之屬。宜近人種。以小鳥好食之。禽經曰。缺者不上。桑櫻活者不下。荏言鳥之食。含桃者乃不下。顧荏耳。

芥

芥似菘而有毛味極辛辣其類甚多似菘者名青芥有紫芥莖葉皆紫作齏食之最美有白芥子麤大色白如梁米舊云從西戎來謂之白胡芥其餘南芥旋芥花芥石芥皆菜茹之美者梁周興嗣次千文云菜重芥薑左傳季郈之雞鬪季氏芥其雞謂以芥播其羽大抵南土多芥嶺表錄異曰廣州地熱種麥則苗而不實北人將蔓菁子就彼種者出土即變為芥嶺南異物志曰南土

芥高者五六尺子如雞卵廣州人以巨芥為鹹菹埋地
中有三十年者貴尚親賓以相餉遺

音釋

藟來丁切 ○ 芣音戶 鉏通作鉏 鑊黃郭切 腳音香牛臄也 臄許云切羊

臄也 臄許堯切 ○ 味音未 莖音遲除 ○ 參 檄音賈

○ 蕩 遂抽六切詩言采其遂 蕩爾雅音他羊切廣韻吐郎切 蔞音商 ○ 著

韞音牘 相去聲 螫音釋 從音縱 ○ 烏咏 芟音急 莖音

謹 薊音色 ○ 門冬 牆音牆 蔕音美 藁音門 穰古猛反

寢通作浸

○蓑荷

上如章反

苴即魚反

蓴普各反一作蓴蓑荷一名

苴苦

以膽和醬也世所謂膽和者也

膾音會又古外切

庶音煮

○活菰

音奪 𦵏

音攘

捻奴協反 覆

音福

○蓼

薈

師力切

薈

音蒿拔去

駕

音如鴿也

○蘓

往而錦反

殺音殺

薈如諸切

策

音窄壓也

○芥

郇音候魯邑名

爾雅翼卷七

欽定四庫全書薈要卷三千二百八十八

經部

爾雅翼卷八

宋羅願撰

釋草八

芙蕖 鬱 瓜 瓠 匏 泉

葛 雞齊 推 榮 蓂 菰

牛薺 苜蓿 臺 莎 稗 稂

莠

芙蕖

荷芙蕖其莖茄其葉蓮其本蓂其華菡萏其實蓮其根藕其中的的中薏李廵曰芙蕖其總名也別名芙蓉郭璞曰蓂莖下白藕在泥中者今江東人呼荷花為芙蓉北方人便以藕為荷亦以蓮為荷蜀人以藕為茄或用其母為華名或用根子為母葉號此皆名相錯習俗傳誤失其正體者也毛詩義疏曰芙蕖莖為荷其葉未發為菡萏已發為芙蕖其實蓮青皮裏白子為的的中有青長三分如鉤為薏語曰苦如薏者也的五月中生

噉脆至秋表皮黑的成可食可磨以為飯輕身益氣令
人強健又可為糜周書曰魚龍成則藪澤竭藪澤竭則
蓮藕掘宋時太官作血蝟庖人削藕皮誤落血中遂散
不凝醫乃用藕療血多効葉可裹物漢鄭敬為新遷功
曹與同郡鄧敬折芰為米以荷為肉齊師伐梁以糧運
不繼調市人餽軍建康令孔奐以麥屑為飯用荷葉裹
之一宿之間得數萬裹古詩有魚戲蓮葉間魚戲蓮葉
東魚戲蓮葉西魚戲蓮葉南魚戲蓮葉北今人言池中

養蓮者莖葉茂密魚動輒損鱗不得遂長古今注一名水芝一名澤芝一名水花管子曰五沃之土生蓮

鬱

鬱鬱金也其根芳香而色黃古者釀黑黍為酒所謂秬者以鬱草和之則酒色香而黃在器流動詩所謂黃流在中者也周禮有鬱人掌裸器凡祭祀賓客之裸事和鬱鬯以實彝而陳之又有鬯人掌共秬鬯而飾之先儒以為鬱者築鬱金煮之以和鬯酒鬱草名為草若蘭十

葉為貫百二十貫為築以煮之鑊中停於祭前莖謂不
和鬱者釀黍為酒芬芳條暢於上下也其祭社縈門共
柎莖雖云無鬱亦尸所飲以灌地其汁下入於地其氣
上升於天故云條暢於上下然則黑黍為酒謂之莖加
鬱則為鬱爾然柎莖亦是兼鬱之通名故鄭注汁獻流
于醢酒云柎莖者中有煮鬱和以盎齊說苑云莖者百
草之本也上暢於天下暢於地無所不暢故天子以莖
為贄說文解莖字云以柎釀鬱草芬芳攸服以降神也

又解鬱字云鬱堯百草之華遠方鬱人所貢芳草合釀之以降神鬱今鬱林郡也然則自常言之堯亦可以兼鬱自鬱與堯對言之則當致其辨爾

晉左九嬪鬱金頌曰越自殊域厥珍

來尋

瓜

瓜古人以紀時故遣戍者稱瓜時而徃及瓜而代大戴禮夏小正五月乃瓜乃瓜者治瓜之辭也瓜也者始食瓜八月剥瓜蓄瓜時也周詩則以七月為食瓜之候蓋

夏之五月也詩云中田有廬疆場有瓜是剥是菹獻之
皇祖曾孫壽考受天之祜蓋薦瓜之重如此故天子樹
瓜華不斂藏之種而為天子削瓜者副之中以絺副析
也既削又四析之乃橫斷之而巾覆焉為國君者華之
巾以綌華中裂之不四析也為大夫累之累俛也謂不
以巾覆士薨之不中裂但橫斷去薨而已庶人齧之不
橫斷也瓜祭則上環食中棄所操古之用瓜者其嚴如
此周詩瓜無所出之地至秦漢間東陵侯種瓜長安城

東而美故謂之東陵瓜又謂之青門瓜其後以遼東盧
江燉煌之種為美而瓜州大瓜如斛御瓜也故名其州
曰瓜其他瓜名尚多說文曰窰嬾也草木皆自豎立唯
瓜瓠之屬卧而不起似若嬾人常卧室故字從山荆楚
之俗七月七日牽牛織女會乃設瓜果於庭中有喜子
網於瓜上則以為得巧以織女主瓜云

瓠

瓠匏之甘者詩甘瓠累之古者王政瓜瓠果蓏植於疆

場正月可種瓠六月可畜瓠八月可斷瓠作菹詩云斷
壺瓠中白膚所謂張蒼肥白如瓠者也可以飼豕致肥
其辦可以作燭致明其葉又可為菜詩所謂幡幡瓠葉
采之亨之是也然與匏不異但當以大小長短甘苦為
間爾然古今亦通言惠子稱魏王貽我大瓠之種世有
種大瓠法鑿坎方廣四五尺先糞其地及生擇取四本
每兩本相近處各以竹刮去半皮併而封之俟其活除
去一穗又復取此兩大本相併復去一穗如前法蓋四

本同發一穗自然易大及著子獨留兩枚如此則一斗

之種變為一石此魏惠王大瓠法也

周禮墜人縈門用
鞞齋注謂取甘瓠

割去祇以
齊為尊

匏

河汾之寶有曲沃之懸匏焉鄒魯之珍有汶陽之孤蓀
焉良工取以為笙崔豹古今注曰匏瓠也壺盧匏之無
柄者也瓠有柄曰懸瓠可為笙曲沃者尤善秋乃可用
用則漆其裏匏在八音之一古者笙十三簧竽三十六

簧皆列管匏內施簧管端通典曰今之笙竽以木代匏而漆殊愈於匏荆梁之南尚存古制南蠻笙則是匏其聲甚劣則後世笙竽不復用匏矣匏既為樂器又以為飲器詩酌之用匏孔子稱繫而不食者良以待其堅而為用故也詩稱匏有苦葉濟有深涉說者徒以為苦葉之生乃濟深之候按叔嚮稱苦匏不材於人共濟而已

注佩匏可
以度水

魯叔孫賦匏有苦葉必將涉矣是苦匏可剗

以涉水鵽冠子曰賤生於無所用中流失船一壺千金

壺即匏也其性浮得之可以免沉溺故當失船之時其值千金也此亦如天竺涉水帶浮囊之類又孔子稱匏瓜繫而不食者近世洪氏說以為天之匏瓜星天官星占曰匏瓜一名天雞在河鼓東匏瓜繫而不食猶言南箕不可簸揚北斗不可以挹酒漿也按楚辭王褒九懷稱援匏瓜兮接糧曹植洛神賦曰歎匏瓜之無匹兮詠牽牛之獨處阮瑤止慾賦曰傷匏瓜之無偶悲織女之獨勤則古稱匏瓜皆謂星爾

泉

有實為苴
無實為泉

麻與麥互相為候麥黃種麻麻黃種麥蓋夏日至之時
麥熟而種麻者以至日前十日為上時至日為中時至
後為下時諺曰夏至後不沒狗或荅曰但雨多沒索駝
蓋雨多則頓盛矣種泉太早則剛堅厚皮多節晚則皮
不堅寧失於早不失於晚詩曰藝麻如之何橫從其畝
按韓鄂四時纂要云種麻熟耕地從橫七遍已上生則
無葉是藝麻欲熟之驗故以比娶妻者欲其告父母熟

思而行之也管子曰五沃之土其陽則安樹之五麻若
高若下不擇疇所其麻大者如箭如葦大長以美其細
者如藿如蒸欲有與各大者不類小者則治揣而藏之
若衆練絲

葛

葛締絡草也國風曰葛之覃兮施于中谷維葉莫莫是
刈是漙又曰葛生蒙楚藪蔓于野旄丘之葛兮何誕之
節兮葛生山澤間其葛延盛者牽其首以至根可二十

步釋丘云前高則旄丘之葛蓋誕闊矣此言雖同根一體然相去差遠其緩急不相應也故曰叔兮伯兮何多日也黎之望於衛亦如此矣吳都賦蕉葛升越弱於羅紈禹貢卉服注云草服葛越葛花藤皆可醒酒去酒毒

漢江都王建傳云繇王閔侯遺建荃葛注荃細布也字本作絰葛即今之葛布也

雞齊

雞齊一名鹿藿一名黃斤今之食葛非為締綌者也其生延蔓甚者其蔓首至根可二十步人皆掘食之生食

甜脆亦可蒸食有粉今江南人凶歲則掘取以禦凶荒
大抵南康廬陵者最勝多肉而少筋甘美然當取入土
深大者或又曰入土五六寸以上者名葛脰服之令人
吐以有微毒也其花藤皆可醒酒而去酒毒服方寸匕
飲酒不知醉博物志曰野葛食之殺人家種之三年不
收後旅生亦不可食吳都賦食葛香茅注云食葛蔓生
與山葛同根特大美於芋也

推

萑薹郭璞曰今荒蔚也葉似荏方莖白華華生節間全
似杜天麻而不生橫枝中谷有薹之詩一章嘆其乾矣
二章嘆其脩矣三章嘆其濕矣此燒薹行水之序也鄭
氏解季夏之月燒薹行水以為薹謂迫地芟草也欲稼
萊地先薹其草草乾燒之至此月大雨流水潦畜於其
中則草死不復生而地美可稼也說文又稱耕暴田曰
暵然則暵其乾者先暴之也暵其脩者火燒之脩脩然
也暵其濕者水浸之也此即周禮薹氏掌殺草夏至日

而難之如欲其化也則以水火變之者也夫暴雖猛猶可蘓也焚雖烈猶可藥也復加之以水則生意盡矣每變愈甚此所以興夫日以哀薄者也張衡東京賦稱秦之暴也如難氏之芟草既蘊崇之又行火焉彼特以為君民之譬而猶惡之况施之夫婦之際耶雖然草之遇此者多矣而獨言夫難者蓋難一名益母曾子見之而悲詩人之託此亦其窮而反本詆之詩色哀相棄則歎兄弟之不知竹竿適異國而不見荅則歎父母之相遠

此所以獨感於益母歟

縠

縠帛屬高四五尺或六七尺葉似苧而薄實如大麻子
今人績以為布及造繩索說文云縠帛屬引詩衣錦縠
衣或作頤又作苧音與頃畝之頃同又云縠縠也引詩
衣錦縠衣示反古作頤音犬迥反而字書苧或作苧然
則縠頤苧縠頤苧一物也今詩用此縠字說者引玉藻
縠為祠祠與縠同以為衣裳用錦而上加縠縠焉以為

庶人之妻嫁服則與許氏說異中庸曰衣錦尚絀惡其

文之著也

本草有苧實圖經云花黃實殼如蜀葵子黑

苧

苧戎葵郭氏曰今蜀葵也似葵華如木槿然今蜀葵非一種有深紅淺紅有紫有白莖皆相似其開花自本以漸至末盛夏次第開敷光彩可觀惟黃者特異葉大而衢深有如龍爪黃花紫心六瓣而側今人亦謂之側金盞收以傳瘡腫之屬大抵作器皿多做此凡草木從戎

者本皆自遠國來古人謹而志之今戎葵一名蜀葵則自蜀來也如胡豆謂之戎菽亦自胡中來戎者胡蜀之摠名耳其來之始今不復知蜀羌髳自商時已通中國矣

菽

菽荊葵也蓋戎葵之類比戎葵葉俱小故謝氏曰菽小草多華又翹起也花似五銖錢大色粉紅有紫文縷之一名錦葵大抵似蘆葍華故陸氏云似蕪菁花紫綠色

可食微苦是也亦其文采相錯故陳風男子悅女比之
曰視爾如荇言如戎葵之葉小而可愛也此與戎葵異
類故釋草着戎葵郭氏曰今蜀葵也似葵華如木槿又
曰荇芣郭氏曰今荊葵也似葵紫色則戎葵與蜀葵
荇與荊葵其所來各不同本草蜀葵中云小花者名錦
葵一名戎葵功用更強則是以此雜之蜀葵中而又反
得戎葵之名矣崔豹古今注又云荊葵一名戎葵一名
芣苢似木槿而光色奪目有紅有紫有青有白有黃莖

葉不殊但花色有異耳一曰蜀葵其說戎葵蜀葵之狀可也混荆葵芘芣之名於內者非也然今人亦通呼此為錦蜀葵則從其類比附之爾又今有一種葉纖長而多缺如鋸花小如錦葵而極紅每以夜半開至午則連房脫落謂之川蜀葵亦云朝開暮落花

牛薺

牛薺今謂之馬薺似芹葉細銳可食菜也生水澤旁苗似鬼針菴菜等花青白色子黃黑色似防風子蓋其子

甘辛而芳故古人云野人有快炙背而美芹子者欲獻之至尊雖有區區之意亦以疎矣此猶彌子瑕之事衛君忘其口而念我者也養生論曰榆令人瞑今牛蘄炒食亦令人得睡然醫方不專食之但用以作飲食與懷香及佛誓國所生時羅等並同大小芳香皆相似但懷香時蘿扁牛蘄長舊說曰牛蘄香似橘皮而無苦味釋草一名茭

首蓓

苜蓿本西域所產自漢武時始入中國史記曰大宛有
苜蓿漢使取其實來於是天子始種苜蓿離宮別觀旁
盡種蒲陶苜蓿極望漢書西域傳亦曰罽賓國有目宿
大宛馬嗜目宿武帝得其馬漢使采蒲陶目宿種歸天
子益種離宮館旁然不言所攜來使者之名博物志曰
張騫使西域得蒲陶胡葱苜蓿蓋以漢使之中騫最名
著故云然而述異記亦曰張騫苜蓿園在今洛中按今
苜蓿甚似中國灰藿但藿苗葉作灰色而苜蓿苗端常

有數葉深紅可愛今人謂之鶴頂草秋後結實黑房累
累如稊故俗人因謂之木粟其米可為飯亦有可以釀
酒者晉華廣免官為庶人武帝登凌雲臺見廣苜蓿園
阡陌甚整依然感舊此物雖出西域今人家羅生等蒿
蓬矣而陶隱居乃云長安中有苜蓿園北人甚重此江
南人不堪食之以無味故也外國復別有苜蓿草以療
目非此類也然按此物即是自外國來又為茹甚軟美
不知隱居何以言此

臺

臺者莎草可為衣以禦雨今人謂之蓑衣詩雅言得賢為邦家立太平之基凡言八物以臺為首蓋禦雨之具雖至微然非平日預知其所在蓄以待乏則一旦欲用索之而不得故特宜先備亦猶賢者之不可不預蓄也越王勾踐棲於會稽之上求謀士退吳者大夫種進對曰臣聞賈人夏則資皮冬則資絺旱則資舟水則資車以待乏也夫雖無四方之憂然謀臣與爪牙之士不可

不養而擇也譬如蓑笠時雨既至必求之今君王既棲
於會稽之上然後乃求謀臣無乃後乎是古者蓄蓑笠
以備患比之賢者之待難矣臺葢賤者所服都人士述
衣服之制葢此詩所述皆儉狐裘黃黃狐不足貴臺
笠緇撮臺笠止雨緇撮通貴賤始冠之服充耳琇實琇
雖美而石垂帶而厲帶長而已傷今人之不遵郊特牲
曰黃衣黃冠而祭息田夫也野夫黃冠黃冠草服也狐
裘黃衣以裼之黃黃謂此大羅氏天子之掌鳥獸者也

諸侯貢屬焉草笠而至尊野服也臺笠謂此蜡禮自伊

耆氏始蓋已久矣然猶存其衣服之制謹而不敢變可
謂衣服不貳從容有常矣此所以傷不復見古之人也
毛氏云臺所以禦暑笠所以禦雨箋云臺夫須也以臺
皮為笠毛氏知臺笠為二物但獨言笠禦雨未當鄭氏
則言臺皮為笠夫臺但可以為衣不可為笠古稱臺笠
蓑笠自謂臺與笠爾不必以臺笠緇撮之語必欲合為
一物也越語所謂蓑笠已見上文又齊語曰今夫農時

雨既至脫衣就功首戴茅蒲身衣襪襪韋昭曰茅蒲簦
笠也茅或作萌萌竹萌之皮所以為笠則笠不用臺為
可知又曰襪襪蓑蓑衣也則襪襪以莎草為之今人作
笠亦多編筍皮及箬葉為之其臺為衣編之若甲氍毹
而垂故雨順注而下然或藉而卧則不能隔雨山海經
曰三危之山有獸其豪如被蓑郭氏亦云蓑皮雨草衣
則莎但可為衣不可為笠明矣臺一名曰夫須蓋匹夫
所須

莎

莎莖葉都似三稜根若附子周匝多毛大者如棗近道

者如杏仁許謂之香附子一名雀頭香合和香用之招

隱云青莎雜樹兮蘋草藿靡說文以為青蘋似莎者然

則蘋與莎相似但以大小為異爾陶隱居以為古人詩

多用之而無識者河中府有綠莎廳晏元獻公述莎記

曰是草耐水旱樂延蔓雖拔心墮葉弗之絕也

子虛賦
薜莎青

蘋張揖曰莎蒲侯也
顏師古曰即今青莎

稗

孟子曰五穀者種之美者也苟為不熟不如稊稗稊與
稗二物也皆有米而細小故莊子曰道在稊稗言比於
穀則微細而不精道亦在焉又曰若稊米之在太倉亦
言小也爾雅稊英釋曰稊一名英似稗之穢草布生於
地而稗則生下澤中故古詩曰蒲稗相因泥勝之書
曰稗水旱無不熟之時又特滋盛易得蕪穢良田畝得
二三十斛宜種之以備凶年又稗中有米熟時可擣取

炊之不減粢米又可釀作酒武帝時令典農種之一項

收二十斛斛得米三升大儉可磨食之蓋稗遇水旱無

不熟而五穀則有熟不熟之時以此不熟方之於稗則

為不如耳草之似穀可以養人者甚多博物志稱篩草

實生海洲上食之如大麥從七月熟民斂至冬乃訖或

曰禹餘糧言禹治水棄其餘糧化而為此本草稱東廬

子虛賦云東廬張揖曰實可食

生河西苗似蓬子似麥可為飯河西人

語曰貸我東廬償爾田梁又苧米可為飯生水田中苗

子似小麥而小四月熟久食不飢爾雅所謂皇守田者也狼尾草子作黍食之令人不飢爾雅所謂孟狼尾者也又有蒯草子亦堪食如杭米又蓬草子作飯無異杭米儉年食之此皆五穀之外可以接糧者故附著之

稂

稂惡草也與禾相雜故詩人惡之古者以飼馬魯仲孫它馬餼不過稂莠謂此也釋草稂童梁郭璞以為莠類說文云禾粟之采生而不成者謂之董節或從禾從良

而陸璣亦云禾粟秀為穗而不成則疑然謂之童梁今

人謂之宿田翁或謂之守田也按詩稱稼之茂美繼之

以不稂不莠去其螟螣及其蠹賊則稂莠以下皆是害

稼者

孔氏正義云稂莠苗既似禾實亦類粟鋤禾除非類

莠既別是一物則稂亦

當是一物故郭璞云莠類蓋未能的知其物故稱其類

耳而許叔重陸璣以為禾之不成者則是亦禾而已何

至與莠並稱乎按本草有狼尾草子作黍食之令人不

飢似茅作穗生澤地廣志曰可作黍引爾雅孟狼尾今

人呼為狼茅子然則此物似是稂爾稂既有實如黍故
能亂苗又莠今謂之狗尾草稂名狼尾則以相類爾雅
疏解孟狼尾亦云草似茅香今人亦以覆屋而鄭解下
泉涕彼苞稂云稂當作凉凉草蕭著之類蓋特取下章
浸蕭著為言去之益遠

莠

莠者害稼之草說文但云禾粟下生莠而已考亦不言
何物詩人以來特惡之故齊詩曰無田甫田維莠騫騫

又曰維莠稂言田廣而人力不至則莠生其中氣象
驕桀陵出苗上也故孔子曰惡莠恐其亂苗也莠既惡
物故言之不美者謂之莠言先儒不適言何物唯韋昭
解魯論云莠草似稷無實又韋曜問答云甫田維莠今
何草答曰今之狗尾也然後此物方顯今之狗尾草誠
似稷而不結實無處不生左傳鄭公孫揮過伯有氏其
門上生莠子羽曰其莠猶在乎以喻伯有不能久存晉
明帝時王如舉兵作亂令人種禾禾悉變莠已而軍敗

商書曰若苗之有莠戰國策曰幽莠之幼也似禾

音釋

芙蕖

茄

古遐切

藟

何加切

蒙

美筆切

弱

音弱

血

音勘

○鬱

鏹中

子遙反又似消反
温器三足而有柄

榮

音詠
汁獻

上之十反下注
讀為莎素何反

沈

舒銳

反醖

莊產切
酒摩娑涕之出其香汁因謂之汁莎

益

烏浪反

○瓜

瓜華

如特牲注
華果蘇也又詔以天子樹
瓜蘇而已戒諸侯以蓄藏蘊財利也

為

于偽

反副

普通

締

勅宜反

析

星歷反

華

胡瓜反

綌

去逆反

累

力果反

壺

音帝

齧恨沒反

去

起呂反

上環

注

頭付也付

本又作刊寸

本反 窠 音庚 山 音眠 ○ 瓠 蘇 魯果切 說文在木 場 音亦

菑 音緇 耕地反 草曰菑 一注 鬴 齋 鬴謂鬴蟲齋 杜讀為 案鄭讀為五齊之齊

崇門用之 注 祗 音帝 ○ 匏 蓀 先鳥切 細竹也 ○ 臬 音徙 如 藿 與 萑 字同

九 揣 楚委切 量也 一曰捶之也 管子注 欲有施與則以 麻之大而類也 細麻既治 揣而藏之 故若練絲

○ 葛 濩 胡郭反 施 以豉反 刈 魚廢反 藪 音廉 卉 許貴反

葛 越 玉月反 文選注 草布也 一音活 ○ 推 萑 推 他回切 荒 齒戎反 蔚

音尉 曠 音漢 雉 音替 暴 步卜切 ○ 檠 音頃 禪 音單 穀

胡谷切 ○ 蓐 音肩 ○ 菽 音翹 苾 苾 音毗 浮 ○ 牛 斬

音芹

恭

音甜

瞑

莫定切
翕目也

○苜蓿

罽賓

上居例切
國名居蔥嶺南

翟徒弔切

○臺

楊

思歷反
袒而有衣曰楊

伊耆

下巨夷切
古天子號

蜡

音乍

索也合聚萬物
索饗百神也

登

音登

襪

上音撥
施隻切

萑薹

國語注
音避

蓐

蓐

含

箸

音若

○莎

霍

音髓
隨風披敷

○稗

英

大結切

節

音尸

蒟

音固

蒟

苦怪切
類

○稂

音郎

○莠

羊九切

適

音的主也

幽莠

夏小正有莠幽
陳翥謂莠也

爾雅翼卷八



總校官庶吉士臣張能照

校對官檢討臣王福清

謄錄監生臣秦在亶

欽定四庫全書薈要

經部

爾雅翼卷

九至
十二

詳校官主事銜臣徐以坤



欽定四庫全書薈要卷三千二百八十九

經部

爾雅翼卷九

宋羅願撰

釋木一



檜

樅

榛

楷

檠

檉

桐

棘

棋

梧

梓

棟

穀

六駁

并閭

檜

檜一名枯禹貢荊州貢杞榦枯栢榦栢也枯檜也故檜

兼有枯音栢葉而松身性能耐寒其材大可為舟及棺
槨左傳稱棺有翰檜而淇水檜楫松舟也衛詩之託興
以為物各有偶檜之與松其生固已相類至其剝剝而
為濟川之用則又相須使女之適異國者每如此則何
有不見答者哉唯其不能然是以有思歸之作是詩與
泉水皆衛女所以寓其思泉水則思出同歸異之肥泉
竹竿則思出同歸同之松檜也檜今人亦謂之圓栢以
別於側栢又有一種別名檜栢不甚長其枝葉乍檜乍

柏一枝之間屢變人家遶宇植之以為玩

樅

樅松葉柏身檜柏葉松身從者合異而為同會者聚兩
以為一故二木合松柏之體而取合從胥會之義猶淮
南子云槐榆與橘柚合而為兄弟也樅大木千仞無枝
利以為夏屋郭璞曰今大廟梁用此木是誠木之可貴
者也尸子曰松柏之鼠不知堂室之有美樅今貂鼠好
在松上食松皮人謂之松狗所謂松柏之鼠當謂此耳

樅松葉柏身其味當美而鼠不知也字說曰檜柏葉松身則葉與身皆曲樅松葉柏身則葉與身皆直樅以直而從之檜以曲而會之以直而從之故音從容之從以曲而會之故音會計之會

榛

榛枝莖如木蓼葉如牛李色高丈餘子如小栗其核中悉如李生則胡桃味膏燭又美亦可食噉漁陽遼代上黨皆饒鄭注禮曰榛似栗而小關中廊坊甚多然則其

字從秦蓋此意也。卽詩曰：山有榛，云誰之思？西方美人
早麓之詩曰：瞻彼早麓，榛楛濟濟。說者曰：早山名也。麓
山足也。早山之足，林木茂盛者，得山雲雨之潤澤也。又
說者以榛可為贄，為文事；楛可為矢，為武事。是蓋不然。
夫榛楛皆用之武事，說文：榛，木也。一曰：敢也。敢，蓋矢之
善者。春秋傳所謂：致師者，左射以敢，是也。若楛則為矢，
甚明。周世脩后稷公劉之業，而申以百福，干祿皆文事
也。然不可無武備，故瑟彼玉瓚，以下述文治之美而首

章言武備也周語曰夫旱麓之榛楛殖故君子得以易樂干祿焉若夫山林匱竭林鹿散亡藪澤肆既民力彫盡田疇荒蕪資用乏匱君子將險哀之不暇而何易樂之有是先有險哀之備而後可以及易樂也又女贄用榛者左傳曰女贄不過榛栗棗脩以告虔也稱告虔者榛有臻至之義栗有戰栗之義棗有早作之義脩有脩飭之義皆以其名告己之虔恭也又一種大小枝葉皆如栗其子形如杼子味亦如栗所謂樹之榛栗者其下

云爰伐琴瑟是大木非榛楛之榛至女贄則宜兩者皆

可用

蜀都賦楬栗鐔發榛與楬同

楛

楛堪為矢其莖似荆而赤其葉如蓍古者楛矢則石為之弩仲尼在陳有隼集於陳遯而死楛矢貫之石弩其長尺有咫問諸仲尼仲尼曰隼來遠矣此肅慎氏之矢也昔武王伐商封異姓以遠方之職貢使無忘服故以楛矢封陳使求諸故府果得之夏書荊州之貢礪砥礪

丹惟箇輅楷則夫楷矢石砮者中州職貢之常也今仲尼獨以遠方之貢為驗豈三代之際職貢不同或者不妨中國自有之特其長尺有咫者為肅慎之物歟是貢既分於陳而隼又適集其逵以死豈陳人竊以射隼耶然仲尼言隼來之遠則是自海外負矢而至也先公之分器受之王室子孫宜相與誦而寶之魯之寶玉大弓出入必書而晉文之受彤弓范匄詫之於諸侯陳之所受於周以鎮撫其社稷者獨有此耳今隼以矢來君臣

相顧乃無識反質之於客抑與數典忘祖者類矣陸璣云上黨人織以為牛管箱器又屈以為釵故上黨人調問婦人欲買楮否曰竈中自有黃土買釵否曰山中自有楮言其俗朴也顏監曰楮木堪為箭筈今幽以北皆用之土俗呼其木為楮子又禹貢惟箄簞楮顏監曰皆可為矢

檠

檠山桑顏師古以為山桑之有點文者其葉可以食蠶

而材尤有用古者青州以絲為貢以屨絲為筐蓋食屨之蠶其絲中琴瑟弦盛之箱篚貴之也其材可以為車轅又可以為弓弓人取幹之道七柘為上櫪次之屨桑次之橘次之木爪次之荆次之竹為下周幽王之亂屨張箕服之謠兆於宣王之時竟取棄女以亡周國先王之制戎器不鬻於市而至於夫婦鬻是器則已異矣屨之為弓見於此時箕草似荻而細織以為矢服說者以為近射妖管子五粟之土其屨其桑周詩言文王之事

攘之剔之其麤其柘

檉

檉河柳郭璞以為河旁赤莖小楊也其皮正赤如絳而葉細如絲婀娜可愛天之將雨檉先起氣以應之故一名雨師而字從聖字說曰知雨而應與於天道木性雖仁聖矣猶未離夫木也小木既聖矣仁不足以名之音赅則赤之貞也神降而為赤云檉非獨能知雨亦能負霜雪大寒不彫有異餘柳蓋莊子以松柏獨受命於地

冬夏青青比舜之受命於天。檉之從聖亦以此歟。詩皇
矣云作之屏之。其蓄其翳。脩之平之。其灌其柵。啓之辟
之。其檉其梣。攘之剔之。其檠其柘。蓋文王之養才於山
林日就繁茂。故其始而屏除之也。始於已死之蓄翳。而
及於龐雜之灌柵。又及於檉梣之小材。又不得已而及
於檠柘之良木。以明草木逾茂則始之所愛者不能並
育以漸去焉。故其卒至於柞械斯拔。松柏斯兗也。然則
檉亦良木矣。漢書鄴善國多檉柳段成式云赤白檉出

涼州大者為炭復入灰汁可以煮銅南都賦注櫪似柏而香今櫪中有脂號櫪乳

桐

榮桐木物之榮者多矣獨桐名榮者桐以三月華蓋自春首東風解凍蟄蟲魚獺鴻鴈皆應陽而作惟桃桐之作華乃在衆木之先其榮可紀故名桐為榮也周書時訓曰清明之日桐始華桐不華歲有大寒蓋不華則陽氣微陽氣微則寒可知已又易緯曰桐枝濡毳而空中

難成易傷須盛氣而後華蓋以經言始華有遲之之義
桐與梧既異而桐之中又有數種有其子可以取油者
蓋即詩所謂其桐其椅其實離離者也有華而不實堪
作琴瑟者若生石間其聲則鳴書嶧陽孤桐是也雲南
牂牁人亦績以為布其葉飼豕肥大三倍至秋後亦用
以飼魚鄉人養鯢魚者每春以草養之頓能肥大秋後
食以桐葉以封魚腹則不復食亦不復瘦以待春復食
也晉武帝時嘗得一石鼓擊之無聲張華請用蜀桐材

刻魚形扣之音聞數里而董仲舒請雨秋以桐魚九枚
莫曉其義王逸子曰木有扶桑梧桐松柏皆受氣淳矣
異於羣類者松柏冬茂陰木也梧桐春榮陽木也扶桑
日所出陰陽之中也管子五粟五沃之土宜桐又漢西
域鄯善國有胡桐亦似桐蟲食其木則沫出其下流者
俗名為胡桐淚言如目中淚也可以汗金銀流俗語訛
呼淚為律

棘

棘心赤而外有刺故朝位植之左九棘孤卿大夫位焉
群士在其後右九棘公侯伯子男位焉群吏在其後面
三槐三公位焉州長衆庶在其後蓋槐取懷來棘欲其
赤心而留意於三刺也又釋木云槐棘醜喬蓋言枝皆
翹竦有奉上之義亦藉其繁茂以為蔽外屏之義也棘
有赤白二種其刺亦有直者鉤者補益用直療腫用鉤
古人所謂造沐猴於棘刺言其難也春秋繁露曰美惡
之類各以類應故以龍致雨以扇逐暑軍之所處生以

棘楚蓋棘者刺人之物楚者撻人之物皆能傷人故緣
類而生亦戟棘也越棘大弓取象於棘又棘可以為矢
昔者楚之先祖桃弧棘矢以共禦王事蓋冰之將出桃
弧棘矢以除其災桃能去厲棘植於花外則花不被霜
所謂除災豈此之謂耶詩曰凱風自南吹彼棘心又曰
吹彼棘薪凱南風也八風以生殺萬物東北曰條風物
至是而條變也東曰明庶風東方日所出以明庶物也
東南曰清明風宅東與南之交故明且清也南曰景風

明之極而有景也西南曰涼風暑至西南而薄也西曰
閭闔風閭闔天之門所以戒藏也西北曰不周風天傾
西北故其風不周徧也北曰廣莫風有北廣莫之野也
凱風既云自南乃當景風白虎通曰景風至棘造實益
吹彼棘心者將以趣其造實萬物之難生者棘而造實
又欲其應候南風雖能生物亦已勞矣八風謂之景衛
詩謂之凱以強教之也以棘為凱風之候則母氏之劬
勞甚矣老子曰師之所處荆棘生焉以荆棘惡木有兵

刑之象皇覽曰孔子塋中不生荆棘及刺人草管子五沃之土其棘其棠

棋

棋枳棋也其木徑尺葉如桑柘以為屋材則室中酒味皆敗其子作房似珊瑚核在其端其味甚甘小兒食之

江東謂之木蜜雀豹古今注云枳棋子一名木蜜一名

木錫實如形

意是枳字

卷曲核在實外味甘美如錫蜜一名

白石一名木實白木實名枳棋古者人君燕食所加庶

羞凡三十一物其果則有菱棋棗栗榛柿瓜桃李梅杏
楂梨又婦人之贄棋榛棗栗荆楚之俗亦鹽藏荷裏以
為冬儲今不以為重賤者食之而已古語云枳棋來巢
言其味甘故飛鳥慕而巢之或云枳句如枳木之勾曲
今枳棋亦自勾曲故四代之俎有虞氏以梔夏后氏以
蕨商以棋周以房俎梔斷木為四足而已蕨之言蹙也
謂中足為橫距之象棋之言枳棋也謂曲撓之房謂足
下跗也上下兩間有似於堂房孔氏以為枳棋之木其

枝多曲撓亦引陸璣草木疏棋曲來巢以證曲撓之義
蓋商姐似棋之曲耳棋今人謂之枰狗又謂之蜜曲錄
梧

梧者植物之多陰最可玩者青皮而白骨似青桐而多
子蓋桐有青赤白而青桐又有有實無實之辨今人以
梧之青亦曰青桐云其生莢如箕子相對綴箕上多者
至五六成材之後樹可得實一石食之味如芡古今方
書稱九藥如梧桐子者蓋倣此也莊子曰考空閱來風

桐乳致巢蓋子生纍然似乳鳥悅於得食因巢其上亦
猶枳椇之來巢以味致之也此木易生鳥嚙墜者輒隨
生殖其畦種者是歲可高一丈古稱鳳凰集於朝陽梧
桐之上豈亦食其實耶或曰梧桐以知日至正南生十
二葉一邊有六葉從下數一葉為一月至上十二葉有
閏十三小餘者視之則知閏何月也

遁甲梧桐不生則九州異梧亦

良木孟子所謂場師舍梧櫝而養櫝棘則為賤場師明
梧者場中所貴也此木雖不中樂器然堪車板盤合木

櫨等用釋木稱櫨梧櫨者棺之別名豈古下卿之罰所謂桐棺三寸者亦有取此耶其皮今人亦剝用之然葉春晚乃生望秋輒槁惠子所以據之而瞑也或者槁梧即琴古者梧桐之名亦通齊地記曰城北十五里有桐臺即梧宮

賈誼新書懸弧之禮東方之弧以梧梧者東方之草春木也南方之弧以柳柳者南方之

草夏木也中央之弧以桑桑者中央之木也西方之弧以棘棘者西方之草秋木也北方之弧以棗棗者北方之草冬木也

梓

梓為百木長故古者名制器之工為梓人商人尚梓用此故也郭氏解椅梓云即楸又解楸榎云大而散楸小而散榎說文亦曰椅梓也梓楸也楸梓也櫟楸也然則椅梓楸櫟一物而四名然定之方中既言椅又言梓故詩義疏曰楸之疏理色白而生子者為梓梓實桐皮曰椅而齊民要術稱白色有角者為梓或名角楸又名子楸黃色無子者為柳楸世呼荆黃楸云然則是數者又以有子為辨耳管子五沃之土宜白梓楚地尤多此木

故尸子曰荆有長松文梓而聲子亦曰杞梓皮革自楚
往也屈原九章望長楸而太息室屋之間有此木則餘
材皆不復震其葉可以飼豕肥碩三倍詩曰維桑與梓
必恭敬止靡瞻匪父靡依匪母古者見喬木必下而趨
所以廣孝桑者母之所事以供蠶繅梓者父之所植以
伐琴瑟故見之而敬恭之心惕然生焉不必待於口澤
手澤之所漸也又梓之為木有子之道昔者伯禽康叔
見周公三見而三筮遂見商子商子使觀于南山之陽

見橋木高而仰又使之觀乎北山之陰見梓焉晉然實而俯商子曰橋者父道也梓者子道也於是二子再見乎周公入門而趨登堂而跪周公拂其首勞而食之則以能子道焉耳雜五行書曰舍西種梓楸五令子孫順孝蓋亦此義莢細如箸其長僅尺冬後葉落而莢猶在樹總總然其實一名豫章崔豹古今注曰棘實曰棗梓實曰豫章桑實曰椹柘實曰佳魯季孫樹六椹於蒲圃東門之外子胥曰植吾墓櫨任昉云中山有楸戶掌楸

木者楸可為什器

貨殖傳山居千章之萩即楸字淮北常山巴南河濟之間千樹萩其人與千戶

侯等

棟

棟木高丈餘葉密如槐而尖三四月開花紅紫色芬香
滿庭其實如小鈴至熟則黃俗謂之苦棟子亦曰金鈴
子可以練故名棟淮南子記十二月之木正月其木楊
許叔重以為楊於春為先二月其木杏杏有竅在中象
陰布散在上三月李四月桃李桃有核與杏同顧先後

熟爾五月榆六月梓其說未聞七月其木棟棟實秋熟
故也八月其木柘亦未聞九月槐槐懷也可以懷來遠
人十月檀檀陰木也十一月棗取其赤心也十二月櫟
可以為車轂木不出火唯櫟為然亦應陰氣也然則古
以棟實應七月之氣管子五位之土種棟又鳳凰非梧
桐不棲非棟實不食荆楚之俗五月五日民並斷新竹
筍為筒縷棟葉插頭纏五絲縷江水中以為辟水厄士
女或棟葉插頭五絲纏臂謂為長命縷俗言屈原以此

日投水百姓競以食祭之漢建武中長沙人有見人自稱三閭大夫者謂之曰所祭甚善常苦為蛟龍所竊蛟龍畏楝葉五色絲自今見祭宜以五色絲合楝葉縛之所以俗並事之宗懔引風俗通以為獬豸食楝原將以信其志也然則鳳凰獬豸皆食楝而蛟龍特畏之是亦異矣

穀

穀惡木也易生之物一說穀田久廢則生穀此聲所以

通於穀其音又近構或曰葉有辨曰楮無曰構其實正赤如楊梅而無核鶴鳴之詩園之所有木不同而其下皆穀則以穀易生故也伊陟相太戊亳有祥桑穀共生於朝傳曰俱生於朝七日而大拱伊陟戒以脩德而木枯劉向以為桑猶喪也穀猶生也穀生之柄失而在下則是以桑穀為二物也而陸璣以為穀幽州謂之穀桑或曰楮桑然則蓋一物也論衡曰楓桐之木生而速長故其皮膚不能堅剛樹檀以五月生葉後彼春榮之

木其材強勁車以為軸商之桑穀七日大拱長速大暴
故為變怪穀雖易生至於七日而拱則已速矣而宋人
刻玉為楮葉三年乃成孔子曰使地三年而成一葉則
物之有葉者寡矣江南人績其皮以為布又擣以為紙
長數丈潔白光澤甚好其葉初生可茹又取斑穀之皮
以為冠裴淵廣州記曰蠻夷取穀皮熟槌為揭裏布鋪
以擬氈然則雖惡木用亦博矣管子五位之土其槐其
棟其柞其穀南山經曰招搖之山有木焉其狀如穀而

黑理其華四照其名曰迷穀佩之不迷

六駁

六駁木名其皮青白駁犖遠而望之似六駁之獸因以
為名其木則梓榆也秦風曰山有苞櫟隰有六駁又曰
山有苞棣隰有樹檍毛氏直以為獸之六駁則與苞櫟
棣檍不相類故陸璣不從也六駁鋸牙之獸能食虎豹
者其狀如馬亦名駁馬此木既以六駁為號故亦兼駁
馬之名又曰馬梓今之檀木皮正青而澤與莢遂及此

木相似故里語曰斫檀不諦得莢遂莢遂尚可得駁馬
夫鳥獸草木之類特為難窮其形之相似者雖山澤之
人朝夕從事有不能別其名之相亂者雖博物君子習
於風雅有不能周故野人伐檀而得駁先儒訓駁而為
獸其去本遠矣崔豹古今注曰山中有木葉似豫樟皮
多癰駁者名曰六駁蘓子由曰其皮青白如駁言六未
詳

并問

張揖解上林賦曰并閭櫟也木高二三丈傍更無枝葉大而圓有如車輪皆萃於木杪其下有皮重疊裹之每皮一匝為一節其花黃白結實作房如魚狀山海經曰石翠之山其木多櫟嶺南西川江南皆有之其皮為用最廣二旬一割則葉轉復生皮作繩入土號為千歲不爛孫權討黃祖祖橫兩蒙衝保守沔口以并閭大紕繫石為矧又齊高帝時軍容寡少乃編櫟皮為馬具裝此蓋軍旅所須故晉令夷民守護櫟皮者一身不輸而唐

書訶陵國在南海洲上立木為城作大屋重閣以機皮
覆之王坐其中此皮堅韌不受雨故可以冒馬覆屋也
一名蒲葵晉人稱蒲葵扇扇自柄上攢衆骨如機葉之
狀今宣歙衢信間扇是也梁張孝秀性通率常冠穀皮
巾躡蒲履執楸櫚皮麈尾唐世以為拂今人遊山者作
機鞋如淳解甘泉賦謂并閭其葉隨時政政平則平政
不平則傾顏師古曰如氏所說自是平慮耳并閭謂機
也

周書王會云白州北閭其
葉若羽伐其木以為車

又郭璞解上林賦曰胥邪

似并閭皮可作索南都賦曰楮枿枿櫚蜀都賦曰櫚枿

音釋

檜 杫 音春勅 倫反 枯 反 古活 柘 反 章夜 翰 注疏楨榦也 〇 樅

子庸七 恭二切 〇 榛 廊 音桴 敢 音鄒通作駒 晁錯傳 肆既

國語注肆極 也 既盡也 杼 時渚切 〇 楷 石 砮 音奴 砥 音脂 一音

礪皆磨 石也 筩 簞 音窘 路 隼 音笋 分 去聲 數 所矩切 管 音管 赫 音

赤 寄 古我切 箭莖 〇 檠 於簾切 櫓 於力切 服 與簾通 〇 檉

菑 側吏反 又音緇 翳 於計反 屏 必領反 除也 灌 古亂反 桲 音例 辟

婢亦反

攘如羊反

剔他歷反

梠

音居積去愧反草木疏節中腫以扶老即今靈

壽是

拔

方貝反

兌

徒外反

柞

才各子反

○桐

獺

他達切

椅

於宜切

牂

牂

上音臧下何切

魚

胡管切

沫

音末

○棘

槐

棘

醜

喬

爾雅注醜類也喬高也槐棘之類枝皆翹竦

三刺

秋官太司寇之職一曰訊羣臣二曰訊羣吏三

曰訊萬民注刺殺也三訊罪連則殺之

趣

音促

○棋

俱甫反

枳

居紙反

錫

除盈切

枿

結奚堅奚二切方木也

卷

音拳

枳

古侯切

宋玉風

枳

句來巢

枳

二反

枳

音款

斷

丁亂反

又

歲

居衛切

附

方于反

曲

撓

禮記注

音擾

橫

距

上古曠反又音光又

空

閱

宋玉賦作空穴司馬彪

曰門戶孔空風善從之

木

牒

齊民要術作履音變履也初觀瞑莊子注音眠槁苦老切○梓爾雅

於宜榎音賈楸音秋𣎵音鵲爾雅注楷皮也老乃皮麓𣎵者為楸小皮而皮麓𣎵者為榎

廣韻注散謂木皮甲錯措音錯勞食皆去聲○棟音練𣎵音谷稊弄

切穀音拱共音拱○六駁音剝駁音黠也榮力醉

○并閭并南都賦作并蒙衝上謨蓮切下昌容切大紩音薛

系也謂以大綆繫丁定切砮音刃楮音胥枒音邪

爾雅翼卷九

欽定四庫全書薈要卷三千二百九十

經部

爾雅翼卷十

宋羅願撰

釋木二

梅

杏

桃

李

櫻桃

棗

栗

櫨

梨

橘

柚

橙

柿

栲

枹

梅

梅先春而華其實亦早故標有梅為昏嫁之候古者以

梅實薦饋食之遵所謂乾蓀是也蜀志曰蜀名梅為蓀
大如鴈子然遵人八遵而棗棗桃乾蓀榛實僅五物故
鄭氏解引內則桃諸梅諸以為證疏者從而廣之曰蓀
為乾梅則桃為濕桃又桃諸是乾者桃有乾濕梅亦應
有乾濕以足八遵之數其實既酸故以為和商書所謂
爾惟鹽梅左氏傳曰水火醢醢鹽梅以亨魚肉禮記則
獸用梅而已詩義疏曰梅暴乾為腊羹臠醢中又可含
以香口梅既為腊故又稱乾腊山海經曰雲山之上其

實乾腊也管子五沃之土其梅其杏其桃其李今江南

梅熟之時輒有細雨連日不絕衣物皆裛謂之梅雨

說苑

曰越使諸發執一枝梅遺梁王夏小正曰正月梅杏桃李則華五月煮梅為豆實

杏

五果為五穀之祥而杏華又候農時四民月令曰三月

杏花盛可苗白沙輕土之田又曰三月昏參夕杏花盛

桑椹赤可種大豆謂之上時汜勝之書曰杏花如何可

耕白沙齊民要術曰杏始華榮輒耕輕土弱土望杏華

落復耕耕輒藺之故農事之候杏花昌葉而已

呂氏春秋曰冬

至後五旬七日莒始生莒者百草之先生者是始耕

又曰禾生於棗或楊黍生

於榆大豆生於槐小豆生於李麻生於楊或荆大麥生

於杏小麥生於桃稻生於柳或揚其生實又為農祥故曰

梅桃杏實多者來歲為之穰師曠占術曰杏多實不蟲

者來年秋禾善五木者五穀之先欲知五穀但視五木

擇其木盛者來年多種之萬不失一故五果分五行所

以表五穀也又按五果之義春之果莫先於梅夏之果

莫先於杏季夏之果莫先於李秋之果莫先於桃冬之果
莫先於栗五時之首寢廟必有薦而此五果適丁其時故
特取之杏之枝葉華果皆赤故古者鑽燧夏取棗杏之火
也夏小正四月園有見杏

桃

桃華之繁麗者故稱桃之夭夭灼灼其華漢二千石綬青
色桃花縹三彩以為華也桃能去不祥桃之實在木上不落
者名梟桃一名桃奴及莖葉毛皆去邪故古者植門以桃梗

出冰以桃弧臨喪以桃茆典術曰桃者五木之精仙木也故厭
伏邪氣制百鬼或曰東海中有度朔山上有大桃木蟠屈三
千里其枝東北曰鬼門萬鬼之所出入有二神人曰神荼鬱
壘主閱衆鬼之惡害人者執以葦索而用以飼虎黃帝法而
象之毆除畢因立桃梗於門戶上畫鬱壘執葦索焉又淮南
子曰羿死於桃楸楸大杖也言為桃木所擊死由是以來鬼
畏之其實桃西方之木味辛氣惡物或惡之木之不用桃猶
茆之不用辛也古者出冰桃弧棘矢以除其災荆楚設之以

共禦王事則其來久矣詩曰灼灼其華有實其實其葉
蓁蓁率以喻昏姻之時韓子曰春植桃李夏得陰其下
秋得食其實春種蒺藜夏不得采其實秋得刺焉以喻
所植之得人與不得其人在始而已灼灼其華以言其
春葉與實以言其夏秋蓋桃者花實俱茂而又早成蓋
三歲而有子諺曰頭白可種桃言可待也桃性皮橫而
急四年以上者宜以刀立剝其皮七八年即老十年即
死是以宜歲常種之春秋運斗樞曰玉衡星散為桃夏

小正六月煮桃桃實有毛故魯以黍雪桃禮記桃曰膽之說者以為膽擇取美者似恐亦是去毛之義

疏曰桃多毛拭

治去毛令色青滑如膽也

李

李木之多子者故从子亦南方之果也火者木之子故名若古文則木傍子為籽其華與桃尤繁密故詩云何彼穠矣華如桃李盖有女同車之詩比之舜華舜英舜並蒂之華彼以諸侯娶諸侯之女故花色相稱也何彼

穠矣之詩比唐棣之華以言其反而後合若下降然故
比於桃李之華則車服不同而皆華盛也春秋運斗樞
曰玉衡星散為李爾雅有三種座接慮李即今之麥李
與麥同熟者為果肉厚而乾與核相離駁赤李則李之
赤而有水者休無實李李實繁則有竊食之嫌雖欲整冠
其下且不可猶漢廣之喬木不可休息無實則其下可
休矣行人謂之行李亦或取於此潘岳賦曰房陵朱仲
之李山海經邊春之山多李古者司商協名姓商五聲

之清者司商掌賜族受姓之官人始生吹律合之定其
姓名至老子生於李下乃指以為姓不假吹律漢京房
本姓李乃吹律改姓京氏不可曉今人論五姓但以張
為商李為徵古法不復見矣管子謂黃帝使后土為李
冬者李也

注李獄官也

越絕書言勾踐諸侯從之若果中之

李

櫻桃

櫻桃朱實甘美飛鳥所含故又名含桃爾雅謂之荊桃

其華在梅後至果熟則最先故仲夏之月以雛嘗黍羞以含桃先薦寢廟漢惠帝時叔孫通亦以為禮春有嘗果願出因取櫻桃獻宗廟諸果獻由此興矣或云此果雖禽鳥所嗜然人未采鳥終不敢先食蜀都賦曰朱櫻春熟廣志櫻桃有長八分者有白色多肌者凡三種今櫻桃有大而色紫亦有如蠟色者潘岳賦三桃表櫻胡之別

棗

棗者束木棗束相重棘束相連東方朔以為從來來者
盖戲辭也大而銳上曰壺細腰曰邊白熟曰擠樹小實
酢曰臧實小而貧紫黑色曰遵大如雞卵曰洗苦味曰
蹶泄不著子曰皆味短苦曰還味棗有十一名郭氏得
九焉後世有紫棗玄棗西王母棗東海蒸棗洛陽夏白
與夫雞心牛頭羊矢獼猴細腰其名不可勝載古者八
月剥棗大載禮曰剥者取也其修治則曰新之曰臛之
以為饋食之籩又以為婦贄其事父母舅姑者棗栗飴

蜜以甘之凶歲亦仰焉秦饑應侯請發五苑之果蔬橡棗栗以活民孔融為東萊賊所攻城欲破其治中左承祖以官棗賦與戰士故古者百穀以為梁者黍稷之揔名稻者漑種之揔名菽者衆豆之揔名三穀各二十種為六十蔬果之屬助穀各二十凡為百穀其實晉人尤好食棗蓋安邑千株棗比千戶侯其人寘之懷袖食無時久之齒皆黃故養生論云齒居晉而黃謂棗故也魏文帝詔羣臣曰南方龍眼荔枝寧比西國蒲陶石蜜乎

酢且不如中國凡棗味莫言安邑御棗也盧諶祭法春

祠用棗油

蘇秦說燕文侯曰北有棗栗之利民雖不由田作棗栗之實足食於民矣潘岳賦曰周文

弱枝之棗

栗

栗其實下垂故从囟囟者艸木實垂囟囟然盖象形也

古文栗从西從二囟徐巡說木至西方戰栗言木則凡

木皆然而栗至罍發之時將墜不墜尤有戰栗之象故

天子五社西社植栗而宰我對栗社之義亦以為使民

戰栗也大戴禮夏小正曰八月栗零零也者降也零而後取之故不言剥也又栗之生極謹密三顆為房其房為蜎毛其中顆褊者號為栗楔尤益人大率栗味鹹性溫而宜於腎有患足弱者曰栗木下多食之至能起行其質縝密故稱玉質縝密以栗玉色黃者倅蒸栗也古者治果實之名栗曰撰之天官籩人以為饋食之豆又以為加籩之實士喪禮設豆右殯南栗東脯而女子用栗為贄以告度喪事虞祭則用桑木為主既練則用栗

主以易之秦風阪有漆隰有栗燕秦千樹栗是其出處也秦饑應侯請發五苑之果蔬橡棗栗以活民昭王不許范子計然曰栗出三輔毛詩義疏曰五方皆有栗周秦吳揚特饒唯漁陽范陽栗甜美長味倭韓國栗大如雞子亦短味不美桂陽有栗叢生大如杼木詩又云山有嘉卉侯栗侯梅侯助辭也西京雜記稱漢上林苑中有侯栗又有侯梅此吳均之語不可取信

檀

櫝似梨而色黃其味酢澁今人謂之榎櫝一曰蠻櫝後
鄭注禮記云櫝是梨之不臧者以其似梨而酢澁即是
不臧而陶隱居以為鄭公不識櫝意其不能別二物也
昔人說蒂間別有重蒂如乳者為木瓜無此者為榎櫝
然二物自別亦不必如此別也古者以為人君燕食所
加庶羞禮記曰櫝梨曰攢之蓋鑽去其心而食之也齊
武帝幸丹陽郡宴飲王敬則執榎櫝以刀子削之是去
其皮也莊子曰夫狙梨橘柚果蓏之屬實熟則剝則辱

大枝折小枝泄以其能苦其生者也今杻樹乃復易壞
宛陵人植木瓜者亦就此木上接之得杻之餘氣則澁
而不美呂氏春秋曰箕山之東有甘櫝山海經曰平丘
有甘櫝則是又有甘者矣又有香杻子小於楹梲而相
似北土無之中都則有唯可生食甚香熟則蘇而不澁
蓋別是一類述異記曰江淮南人至北見楹梲香以為
杻子謂此也乎管子曰五沃之土生楂

梨

梨果之適口者剖裂以食故古人言剖裂為剖梨又曰

櫛梨曰鑽之蓋櫛梨喜為蜂所螫螫處輒不可食故鑽

去之今人皆就木上大作油囊裹之梨滋長其中故益

大而無傷辛氏三秦記曰漢武帝園一名樊川一名御

宿有大梨如五升落地則破其主取以布囊盛之名曰

含消又廣志曰真定御梨脆如菱蜀都賦曰紫梨津潤

是其類也梨之色多黑故稱鰲黑者皆從梨言有凍梨

之色也每梨有十餘子唯一子生梨餘皆生杜

潘岳賦
曰張公

大谷之黎秣陵有

哀仲家黎甚美

橘

橘生於江南素華丹實皮既馨香又有善味尤生於洞庭之包山過江北則無故曰江南種橘江北為枳考工記云踰淮而北為枳則有異同故橘頌云后皇嘉樹橘徠服兮受命不遷生南國兮屈原比之夷齊願置以為像取其貞介似有志也禹貢揚州厥包橘柚錫貢言錫而貢之地理志曰蜀郡嚴道巴郡朐腮魚復二縣出橘

有橘官又曹叔異物志交趾橘官長一人秩三百石主
歲貢御橘越人歲多橘稅謂之橙橘戶吳闕澤表請除
臣之橘籍是也春秋運斗樞曰璇星散為橘弓人以橘
為幹又有甘橘其形似橘而圓大皮色生青熟則黃赤
未經霜時尤酸霜後甚甜故名甘子生嶺南及江南上
林賦曰黃甘橙摺郭璞曰黃甘橘屬而味精崔豹古今
注曰甘實形如石榴者謂之壺甘其名別於此唐天寶
十載宮甘結實與江劒無殊今洞庭之包山歲貢謂之

洞庭甘李衡臨終勅其子曰龍陽洲裏有千頭木奴及
甘橘成歲得絹數千匹即江陵千樹橘比千戶侯之義
也本草橘柚條云酸者聚痰甜者潤肺橘小橘也
出武陵
柚

柚似橘而大其味尤酸孔安國云小曰橘大曰柚郭璞
則曰柚似橙而大於橘禹貢揚州厥包橘柚錫貢橘柚
皆不耐寒故包裹而致之也錫貢者須錫命而獻之言
不常來也列子曰吳楚之國有大木焉其名爲檮碧木

而冬生實丹而味酸食其皮汁已憤厥之疾齊州珍之
渡淮而北化為枳焉則是其類子虛賦橘柚芬芳蜀都
賦家有鹽井之泉戶有橘柚之園廣志曰成都有柚大
如斗呂氏春秋果之美者江浦之橘雲夢之柚

橙

橙之芳用在皮甘之甘在瓢其木似橘其葉中細如蜂
腰其實稍早橙之黃時摘方尚綠其形圓大於橘而香
皮厚而皺乃正黃色不若甘橘之帶赤也本草云其皮

苦辛作酢醬香美蓋獨宜為和故張景陽七命云燁以

秋橙醑以春梅

韓文公詩鵲殼攢瓊橙南都賦曰穠橙鄧橘說文橙橘屬庚闡揚都賦曰黃甘

朱橙顏師古注相如賦曰橙即柚也誤矣

柿

柿於經乃復罕見唯內則所加庶羞三十一物中有之
實黃而大味甚甘亦暴而食之說文赤實果也又有紅
柿皮深紅而多水又有裨似柿而青黑生江淮南所謂
梁侯烏裨之柿是也利以作漆漆與蟹性反故不宜與

蟹同食其葉厚經霜乃丹色上林賦枇杷檮柿齊民要術
云柿有小者栽之無者取枝於輦棗根上挿之俗謂柿有
七絕一壽二多陰三無鳥巢四無蟲蠹五霜葉可翫六嘉
實七落葉肥大又木中根固者唯柿為最俗謂之柿盤

急就

篇曰梨柿柰桃待露霜南都賦
曰櫻梅山柿鄭虔以柿葉學書

栲

栲今之梗棗也結實似柿而極小其蒂四出枝葉皮核皆
似柿秋晚而紅乾之則紫黑如蒲萄其大小亦然今人謂

人謂之丁香柿又謂之牛乳柿子虛賦所謂攄梨攄栗者
也上林賦攄棗楊梅南都賦攄棗若留蜀都賦橙柿攄攄
說文曰攄棗也似柿而小崔豹古今注亦曰攄棗葉如柿
實似柿而小味亦甘美釋木云遵羊棗郭氏曰實小而圓
紫黑色今俗呼之為羊矢棗引孟子曰曾皙嗜羊棗按曾
皙嗜羊棗而曾子不忍食羊棗若文王昌歆屈到嗜芡之
類則宜為果屬然公孫丑稱膾炙與羊棗孰美又似是判
羊為飲食之名未知其審齊民要術云攄棗宜陰地種之

陽中則少實足霜色殷然後乃收早收則澁不任食內則
人君燕食所加庶羞有芝栢菱棋棗栗榛柿瓜桃李梅杏
楂梨等庾蔚云無華葉而生者曰芝栢盧氏云芝木芝也
王肅云無華而實者名栢皆芝屬賀氏則云芝木堪栢軟
棗蓋鄭氏言三十一物先儒以為合芝栢數之乃當三十一
之數故皆不用賀氏之說然栢既甘果亦安可廢

披

披似貼而異杉以材稱披又有美實而材尤文彩釋木云

披粘蓋以類相附也其樹大連抱高數仞葉似粘其木如拍作松理而絕難長肌理細軟堪為器用古所謂文木柏堅緻有文彩而色黃銀杏色瑩白而太輕易損成跡唯披既有文彩又勁於銀杏實良木也其木自有牝牡牡者華而牝者自實理有相感不可致詰其實有皮殼大小如棗而短去皮殼可生食亦饒而收之可以經久以小而心實者為佳本草木部有樞實又有彼子皆出永昌而誤在蟲部蓋彼字當從木即是樞也陶弘景

注樞實出東陽諸郡而不識彼子惟蘇恭能辨其為一物今彼子退入有名無用中矣

音釋

梅

蓀

音老

裒

音浥

又於怯反

○桃

縹

敷沼切

梟

古克反

荊

音列

荊

荊荊

○栗

楔

音肩

倭

鳥禾切

○攄

臨

力鳩切

楮

步項切

○剗

力支切

○李

瘞

徂和切

駁

音剝

○李

齊

子弓切

○李

齊

子弓切

○李

齊

子弓切

○李

齊

子弓切

注李之無實名休

○棗

束

讀若刺

○李

齊

子弓切

○李

齊

子弓切

○李

齊

子弓切

○李

齊

子弓切

○李

齊

子弓切

○李

齊

子弓切

子弓切

泄

音肩

還

上音旋

○李

齊

子弓切

○李

齊

子弓切

○李

齊

子弓切

○李

齊

子弓切

○李

齊

子弓切

○李

齊

子弓切

子弓切

側加

棋

亡零切

攢

內則注

攢

再官切

○李

齊

子弓切

○李

齊

子弓切

○李

齊

子弓切

○李

齊

子弓切

○李

齊

子弓切

子弓切

孔楹切於勃杼切蒲骨○梨螫音失蟲行毒○橘胸臆上音蠹下

如尹切閼姓也苦揍且豆切○柚櫟與袖同○橙觶音攘

縣名燁音闡炊也注穰鄧漢書南陽郡有穰縣鄧縣酤文選注酤與沽同○柿裨

薄雞撚賦注音煙輓音軟○楔音郢榎如充切檠音亭張揖曰山梨歠感徂

切殷烏閑切桷音而○披音彼貼音杉僂皮逼切火乾也與煊字同

爾雅翼卷十